

Success appartegnent il cristal ord la Neat

Decisiun da la dretgira superiura da l'Uri

DA CLAUDIA CADRUVI / ANR

■ **La dretgira chantunala da l'Uri dat raschun a Teodosi Venzin. La procura publica sto dar enavos ad el il cristal ch'ella ha confiscà la primavaira. I sa tracta d'in «malau» ord il tunnel da basa dal Gottard. L'emna passada ha il chavacrappa tuatschin survegnì la buna nova da ses advocat Fortunato Vincenz: El po ir en l'Uri per ses «mulau». La procura publica dal chantun Uri sto restituir il cristal.**

Il cristal ord la Neat aveva *Dosi Venzin* acquistà avant sis onns per 17 000 francs a la bursa da mineralias a Minca. I sa tracta dad ina da las grondas bursas mundialas. Il chavacrappa tuatschin era preschent a la bursa sco vendider. El ha vesì il cristal tar in auter vendider ed è sa decidi per la cumpra. Il cristal aveva fin lez mument gia midà quatter giadas possessur. Da lezzas uras na sminava Venzin anc betg ch'el crodia cun questa cumpra en las rodas da la giustia – u meglier ditg en ils mauns dal procuratur uranais.

L'emprim perditga, lura suspectà

In mez onn suenter la bursa a Minca vul la procuratura da l'Uri interrogar Venzin sco perditga. Dus chavacristallas dal chantun Uri vegnan suspectads d'avair cunterfatg al scumond da tschertgar cristallas e d'avair handlegià cun cristallas ch'els han cumprà da miniers da la Neat. La procuratura vul savair da Venzin da tgi ch'el haja cumprà ses cristal che duai era derivar da quests dus chavacristallas. Venzin dat pled e fatg e prenda perfin cun sai il «mulau», uschia che las autoritads uranaisas pon fotografar ed examinar il crap. Tut quai succeda il 2009. Quatter onns na dauda il Tuatschin nagut pli – fin ch'i vegn ina brev da l'Uri. Uss prenda la procuratura tuttenina en mira Venzin. I vegn avert ina inquisiziun



La dretgira chantunala da l'Uri dat raschun a Teodosi Venzin.

KEYSTONE

pervi da zuppentada, «Hehlerei». Il mars da quest onn cumpara la polizia perfin en il lavuratori a Sedrun e confistgescha il cristal. Fortunato Vincenz, l'avocat da Venzin, fa recurs.

In lavachau per la procura publica

L'emna passada ha la dretgira d'Uri decidi appartegnent il recurs. La procuratura sto dar enavos il cristal ed il recurrent survegn ina indemnisaziun da 2384 francs.

La dretgira crititgescha l'agir dal procuratur en plirs puncts. Ina confiscaziun saja lubida mo en cas da suspects suffizients e stoppia esser commensurada e giustifitgada. Encunter ils dus chavacristallas uranais, che hajan handlegià cun las cristallas da la Neat, haja il procuratur

interprendì nagut. «Sut questas circumstanças è ina confiscaziun pauc commensurada», scriva la dretgira. La dretgira menziuna era che las examinaziuns da la procura publica sajan stadas airi tranter il 2009 ed il 2013 ed ins n'haja guadagnà entaifer quel temp naginas novas enconuschientschas.

Tge delict da basa èsi insumma?

La procura aveva argumentà ch'i saja giustifitgà da confiscar il crap en vista a la grevezza dal malfatg ch'ella suspecta tar Venzin. La dretgira da l'Uri è d'in auter avis e metta schizunt en dumonda ch'ins possa discurre d'in cas da zuppentada, «Hehlerei». Per insumma savair discurre da zuppentada dovri numnadamain l'emprim in delict da basa, sco

per exempel in ladernitsch. La dretgira crititgescha ch'il procuratur public na concretisescha betg sin tge delict ch'el sa basia insumma. I na saja gea gnanca cler tge ch'ins renfatschia propi als dus chavacristallas da l'Uri, nundir al cumprader Venzin. Sch'ins sa basia sin l'ordinaziun da chavar cristallas en l'Uri, lura saja il surpassament gia passà uschè daditg ch'in casti na vegnia betg pli en dumonda.

Er in enguladitsch tenor il cudesch penal na vegnia betg en dumonda sco delict da basa, explitgescha la dretgira. La premissa per in enguladitsch è ch'ins sa patrùnia d'ina chausa estra. Ils cristals da la Neat na sajan dentant betg ina chausa estra, mabain ina chausa senza patrùn – era sch'els stettian sut il patri-

moni dal stadi. «Il delict, cun il qual il mulau è vegnì purtà or dal tunnel da basa dal Gottard, n'è betg da fastizar senz'alter», scriva la dretgira.

In «success parzial»

Questa decisiun da la dretgira uranaisa saja in «success parzial», di l'avocat Fortunato Vincenz a l'anr. En sasez haja la dretgira gea decidi sulettamain davart il recurs pervi da la confiscada dal crap. Tuttina haja la dretgira era fatg intginas ponderaziuns da basa che pertutgian la renfatscha da la zuppentada. En vista a questa ponderaziun è Vincenz plain fidanza che la procura publica uranaisa lascha crudar era l'inculpaziun da la zuppentada.

«Teodosi Fall» sin SRF e 3Sat

Il cineast *Gieri Venzin* ha fatg l'atun passà in film cun il chavacrappa da Rueras. La Television Svizra ha purtà «Teodosi Fall» il schaner. Questa stad è il film stà da vesair sin 3Sat. En l'emprima part raquinta Teodosi Venzin dal grev accident ch'el ha già en la chavorgia dal Cavradi. En la segunda part relata el co ch'el è crudà en ils latschs da la giustia: Il 2008 ha Venzin cumprà in cristal ord la Neat a la bursa da mineralias a Minca. El è stà da buna fai, pertge cristals da la Neat datti da cumprar dapertut sin la fiera. Tschintg onns pli tard – suenter ch'el è sa revegnì da ses grev accident – vegn Dosi Venzin suspectà da la procuratura publica dal chantun Uri.